

www.BibleForChildren.org


Mataayo 8



Mbe, jejire jaatura siku ebhiri, nibhukorekana obhuregesi mu-musi gwa Kaana, mu-mukoowa gwa Gariraaya. Mu-bhuregesi obhwo, nyiramwene Yeesu wone aariga ari-wo. Yeesu na abheeyigisibhwa bhaaye wone bhaariga bhakokerwe mu-bhuregesi obhwo.



Echifuufu cha emijabhiibhu chejire chaawa,
nyiramwene Yeesu ^naamubhwira ati, "Abhagenyi
bhaamara echifuufu choone." Niwo nyiramwene
^naabhwira abhakosi ati, "Omusango gwonegwone
gunu araabhabhwire, mugukore."



Mbe Yeesu ^naabhwira abhakosi bharya
ati, "Mwijusye amanji mu-matuumo omwo."
Abheene nibheejusya amanji jabhijabhi.
Neeya, Yeesu ^naabhabhwira ati, "Woori,
mutaye amanji matyari mu-matuumo
omwo, musirire omukuru wa
obhuregesi." Abheene wone
nibhakora

kutyo.



Omukuru wa obhuregesi ^naarabha amanji,
^naasombookerwa ati, gayinduuywe okubha echifuufu!

Omwene :ataamenyere

anu echifuufu echo

:chaasookere, nawe

abhakosi bhanu

:bhaatayire amanji

mu-matuumo murya

:bhaamenyere.

Niwo

^naabhirikira

omutwasi.



Omutwasi ejire aakinga, omukuru wa obhuregesi
^naamubhwira ati, "Bhuri muunu unu kaakora
obhuregesi kaatangataga
okwamba okuyaana
abhagenyi echifuufu
cha ekisi."



"Abhagenyi bhaakanywa, nibheeywa, niwo kaareeta echifuufu chinu chitari cha ekisi. Nawe awe waareeta echifuufu cha ekisi muno ku-bhuteero!"




Yeesu :aakorere echibharikisyo echo mu-musi gwa
Kaana mu-mukoowa gwa Gariraaya.
Echo nicho echibharikisyo cha
okwamba chinu :aakorere
okweresya rikusyo ryaye,
na abheeyigisibhwa
bhaaye nibhamwikirisya.



Neeya Yeesu ^naakinga ewa Peetero.
Ejire eengira mu-nju, ^naasong'ana
nyaabhuko Peetero amaamire
ku-bhuriri, ari na omuswija mwafu.



Yeesu ^naamukuun'ya ku-kubhoko, awoawo ^naawora.
Niwo ^neemuka, ^naamba okufurubhendera Yeesu.




Orusuku orwo keegoro, Isabhaato yejire yaatura,
abhaanu bha mu-musi omwo nibhareetera Yeesu
abharwaye bhaafu,
na bhanu bhaariga
bhawungirwe
amasambwa.
Abhaanu bhaafu
okusooka mu-musi
omwo nibhabhugana
ku-rubhuga rwa inju
ya Simooni na
Andereya.



Yeesu ^naawosya abhaanu bhaafu bhanu bhaariga bhari na amarwara ga bhuri mbaga. Ka wone, ^naabhasoosya-ko amasambwa maafu, nawe :ateekirisisiisye amasambwa gaayike, kwa okubha gaariga gamumenyere ati ni Mwana wa Nyamuwanga.



Abhaanu abho bhoone, bheendaga okumukuun'ya-ko,
kwa okubha obhuturo bhwa okuwosya bhwariga
nibhumusooka-ko, na okubhawosya bhoone.



Omwanya gunu aaraasyaga, nibhaaja abhaanu bhana,
bhayangire kw-iraro omuunu unu aariga afuuwe
omubhiri.



Nibhataamibhwa okumwingisya
anu Yeesu aariga ari, ku-songa
ya echise echinene
cha abhaanu.



Nibhariinya ku-rusara rwa inju,
nibhafumura orusara obhwima
na anu Yeesu aariga ari,
nibhooromosya
omurwaye
ari kw-iraro.



Yeesu ejire aarora eriikirisya ryebhwe,
^naabhwira omurwaye
oyo ati, "Omwana
waani, waafwirwa
echigongo
ebhibhiibhi
bhyawo."
"Enikubhwira
ati, imereeguru!
Ugege riraro
ryawo, ugende
iika ewaawo!"



Mbe, Yeesu ^naariinya mu-ngama, abheeyigisibhwa
bhaaye wone nibhamuruubha omwo.
Ringira, bhejire bhaakinga
mu-bhusibha, nigutiimuka
omuyaga gwa echiiwure,
amakonjo nigabhuma
ingama niyamba okusika.
Nawe Yeesu omwene
aariga awongeeye.



Yeesu ^naabhabhwira ati, "Ni kurwa ki omuubhaya,
emwe abha eriikirisya ritooto?" Niwo ^neemuka,
^naagonya omuyaga na amakonjo. Awoawo, inyanja
niibha etore chimwi. Abheeyigisibhwa bhaaye
nibharuguura, nibhaayikaga ati,
"Ni muunu wa mbaga ki unu?
Noorwo omuyaga na
amakonjo
ebhimugayuka!"



Nyamuwanga
eendere muno
abhaanu bhoone bha ku-chaaro kunu.
Nikwo okukora :aatumire Omwana
waaye wenyere aaje ku-chaaro kunu,
korereki bhuri muunu unu keekirisya
Omwana oyo aasiga okusimagira,
tari abhe na obhuwanga
bhwa akajaanende
koone.



Abharuumi 3:23 kwa okubha abhaanu bhoone bhakorere ebhibhiibhi na abhagerukirwa rikusyo rya Nyamuwanga.

Abharuumi 6:23 Omuunu woonewoone unu ari mugaya wa echibhiibhi, omuyeero gwaye ni rufu rwa akajaanende koone. Nawe eswe, Nyamuwanga kaachiyaana obhuwanga bhwa akajaanende koone. Obhuwanga obhwo bhutari muyeero, tari ni chiyaanwa chinu echiramira okutura ku-Kirisito Yeesu, Raatabhugenyi weeswe.

Abhayebhuraniya 9:27 Bhuri muunu atereeywe-wo okufwa rumwi era, akamara okufwa kaarindirira okuramurwa na Nyamuwanga.



Abhayefeeso 2:8,9 Okubha muchunguuywe kwa obhwitiriranya bhwaye, ku-njira ya okwikirisya Yeesu. Obhuchungusi obhwo, bhutasookere kw-imwe, tari ni chiyaanwa cha Nyamuwanga kw-imwe.

: Ataabhachunguuye okuruubhana na ebhikorwa bhyemwe bhya ekisi, korereki omuunu woonewoone asige okwikuuya.

Abharuumi 10:9,10 Omusango ogwo ni ati, ukatogora mu-kanwa kaawo omwene ati, "Yeesu ni Raatabhugenyi," na okwikirisya mu-mwoyo gwawo ati Nyamuwanga : aamusuuruuye okusooka mu-bhafuuwe, urichungurwa na Nyamuwanga. Omuunu akeekirisya Yeesu Kirisito kwa omwoyo gwaye, kaabharwa okubha omurengeresi imbere ya Nyamuwanga. Aakatogora eriikirisya ryaye kwa omunwa gwaye, kaachungurwa.



Yowana 3:16,17 Nyamuwanga eendere muno abhaanu bhoone bha ku-chaaro kunu. Nikwo okukora : aatumire Omwana waaye wenyere aaje ku-chaaro kunu, korereki bhuri muunu unu keekirisya Omwana oyo aasiga okusimagira, tari abhe na obhuwanga bhwa akajaanende koone. Nyamuwanga : ataatumire Omwana waaye ku-chaaro kunu, korereki aramure abhaanu, tari : aamutumire korereki abhaanu bhachungurwe okutura ku-mwene.

1 Yowana 5:11-13 Obhubhambaasi obhwo ni bhunu, Nyamuwanga achiyaanire obhuwanga bhwa akajaanende koone. Obhuwanga obhwo echibhubhona kwa okwikirisya Omwana waaye. Omuunu woonewoone unu ari na obhumwi na Omwana wa Nyamuwanga, ari na obhuwanga obhwo. Nawe unu atari na obhumwi nage, atari nabhwo. Enibhakaamira inyarubha inu, emwe bhanu omwikirisya risiina rya Omwana wa Nyamuwanga, korereki mumenye ati muri na obhuwanga bhwa akajaanende koone.



Mataayo 8-9; Maariko 1-2, 4; Ruuka 4, 8;
Yowana 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Jita Bible (jit) © 2023, Wycliffe Bible Translators, Inc.
All rights reserved.

<https://www.bible.com/bible/2238/MAT.1>

©2024 Bible for Children, Inc.

www.M1914.org

www.bibleforchildren.org

